

**Sud Bosne i Hercegovine
Суд Босне и Херцеговине**

Broj: S1 3 U 020836 16 U
Sarajevo, 21.04.2016. godine

Sud Bosne i Hercegovine u Sarajevu, u vijeću za upravne sporove sastavljenom od sudija Jadranke Brenjo, kao predsjednika vijeća, Željke Krmek i Branimira Orašarin kao članova vijeća, uz sudjelovanje Azre Mušanović, kao zapisničara, u upravnom sporu tužitelja „Udruženje društava za osiguranje u Federaciji Bosne i Hercegovine”, koje zastupa Feđa Morankić, predsjednik Udruženja, ulica Đoke Mazalića broj 13, Sarajevo, protiv rješenja broj: UP1 03-1-37-1-160-5/15 BA od 08.12.2015. godine, tužene Agencije za zaštitu ličnih/osobnih podataka u Bosni i Hercegovini, Sarajevo, u upravnoj stvari poništenja rješenja, na nejavnoj sjednici održanoj dana 21.04.2016. godine, donio je sljedeće:

RJEŠENJE

Tužba se odbacuje.

Obrazloženje

Rješenjem tužene, broj UP1 03-1-37-1-160-5/15 BA od 08.12.2015. godine, tužitelju je naloženo da izbriše jedinstvene matične brojeve štetnika iz evidencije Lista štetnika, u roku od 30 dana od dana prijema pobijanog rješenja, te da o tome dostavi pismenu obavijest i dokaz Agenciji za zaštitu ličnih podataka u Bosni i Hercegovini.

Protiv ovog rješenja tužitelj je dana 10.02.2016. godine podnio ovom sudu tužbu za pokretanje upravnog spora, kojom je predložio da sud u postupku provjeri sve navode iz tužbe i stvar riješi u smislu člana 34. stav 3. Zakona o upravnim sporovima BiH i donese presudu kojom će poništiti pobijano rješenje i riješiti ovu upravnu stvar.

Sud je prethodno ispitao postojanje procesno-pravnih uslova za meritorno odlučivanje o tužbi, pa je našao da isti ne postoje, iz razloga što je tužba podnesena neblagovremeno.

Iz spisa tuženog i dostavnice o uručanju osporenog rješenja proizlazi da je navedeno rješenje tužitelju dostavljeno dana 10.12.2015. godine. Iz potvrde o prijemu dokumenta kod ovog suda evidentno je da je tužitelj tužbu protiv navedenog rješenja podnio sudu lično dana 10.02.2016. godine.

Odredbom člana 19. stav 2. Zakona o upravnim sporovima („Sl. glasnik BiH“ broj: 19/02, 88/07, 83/08 i 74/10) propisano je da se tužba za pokretanje upravnog spora može podnijeti u roku od 60 dana kada je podnosilac tužbe primio konačni upravni akt ili rješenje. Radi se o roku koji je određen na dane i koji se računa tako da se u ovaj rok ne uračunava dan kada je izvršeno dostavljanje, odnosno saopštenje rješenja, nego se za početak roka uzima prvi idući dan (član 264. stav 2. i stav 4. Zakona o parničnom postupku pred Sudom BiH - „Službeni glasnik BiH“, broj 36/04, 84/07, 58/13 - koji se u smislu odredbe člana 60. a Zakona o upravnim sporovima BiH shodno primjenjuje u upravnom sporu). U slučaju da posljednji dan roka pada na državni praznik ili nedelju, tada rok određen na dane ističe protekom prvog idućeg radnog dana.

U konkretnom slučaju tužitelju je rok od 60 dana počeo da teče 11.12.2015. godine, a posljednji dan za podnošenje tužbe je bio 08.02.2016. godine. Kako je tužitelj tužbu protiv rješenja tužene podnio dana 10.02.2016. godine, a posljednji dan za podnošenje tužbe je bio 08.02.2016, tužba je neblagovremena, jer je podnesena nakon protoka zakonom propisanog roka od 60 dana od dana prijema osporenog rješenja, te je prema tome tužbu valjalo odbaciti kao neblagovremenu.

Zbog navedenih razloga ovaj sud je primjenom člana 25. stav 1. tačka 1.) Zakona o upravnim sporovima BiH, odlučio kao u dispozitivu rješenja.

ZAPISNIČAR
Azra Mušanović

PREDŠJEDNIK VIJEĆA
SUDIJA
Jadranka Brenjo

U skladu sa pravilima postupka - po
Odluka
[Signature]

